

# FRAMESBY OUDSKOLIERE



## ONS GESELS MET: RIANA FERREIRA (NEÉ VAN DER MERWE)



*Riana Ferreira*

Ek het in 1986 gematrikuleer.

Ek dink met baie mooi herinneringe aan my tyd by Framesby en die vriendskappe wat tot vandag toe nog bestaan. Ons hou ons nog elke jaar 'n klein "reünie" as ons maats van heide en verre Oos-Kaap toe kom gedurende die Desembervakansie. Mense het altyd gesê dat jy eendag gaan terug verlang na jou skooldae, en dis waar. Dit was lekker skooljare. Ons was sowat 248 skoliere in 1986 in matriek - een van die grootste wat Framesby nog gehad het.

Ons het vriende gemaak en gesels oor alles en niks. Ons het elke dag op iemand anders verlief geraak en 'love' letters geskryf en in die klas aangegee en dan op hete kole gesit en kyk hoe die briefie sy pad na die geliefde maak en hoe hulle reageer. Partykeer was ons punte goed ander dae minder goed en volgende keer het ons net harder geleer. Vandag kyk ek terug na goeie tye en het goeie "memories", want dit het

my voorberei vir die lewe om die goed met die sleg te aanvaar, hard te werk vir dit wat ek wil bereik en die beste daarvan te maak. Skool het my geleer vasbyt.

Daar was nie eintlik baie bekommernisse nie, behalwe om so vroeg as moontlik by die skool te wees om jou huiswerk uit te ruil en om af te skryf - veral as die vak voor pouse val. Pouses kon jy nog met die huiswerk inhaal en my Rekeningkundeboek het sy normale draaie gemaak.

Ek het elke dag fiets skool toe gery. Wanneer die eerste klok lui, is die skoolhekke agter jou toegesluit en die laatkommers word gelys. Hulle gaan detensie, in die biblioteek sit. Voorskool staan ons in klasrye en word begroet met afkondigings. As die skool se deure toebly tydens afkondigings en daarna stadig oopmaak moet jy weet: maak los jou rokband om jou middel en laat sak die rok, want hier kom rok-inspeksie. Die soom moet bo jou knieë wees of jy word gehelp om die some los te maak. Haarinspeksie en naelinspeksie volg sommer soos jy instap skool toe. Mnr. Herman Koornhof het sy klaskamer net bo die trappe gehad en met sy skrefies oë jou deurgekyk en gangpraters gesoek. Niemand praat in die gange nie en jy loop in gelid agtermekaar. Hier en daar ruk hy 'n maat met 'n skewe das, gesakte kouse of los skoenveters uit.

Mnr. Dudley het Ekonomie gegee. Ek sal nooit vergeet hoe hy voor sy klasdeur staan en vir die laatlopers met: "Ek sluit my deuur" aanmoedig om vinniger te stap. Hy het so lekker gebrei. Ek en Ekonomie was nie lank maats nie, want ek moes lang opstelle oor vraag en aanbod skryf en al waarin ek belanggestel het, was die Minister van Finansies se begrotingsrede en belasting. Huishoudkunde in mev. Smal se klas was baie aanlokliker en toe maak ek my skuif tot groot verligting van mnr. Dudley. Die seuns het pouses al ons brouels kom opeet en ek het geleer van onderstebo pynappel poeding/tert, skons en 'high teas". My ma se koppies en pierings is elke kwartaal op en af tussen die huis en die skool vir die Huishoudkunde praktiese eksamens gedra.

Daar was of is 'n instelling by Framesby dat die skoolhoof, in my jare mnr. Johan Kritzinger, op sy verjaarsdag te "verras" en deur die matriekklas by sy huis te gaan haal. Ek kan onthou dat hy binne 'n hok, op 'n motorfiets, op 'n trek en met 'n doodskis



al skool toe gebring was ondergroot toejuiging van die skoliere.

In 1985 het Framesby die eerste Afrikaans skool in die land geword wat met 'n krieketspan oorsee toer. Hulle het in Engeland op die Lordsveld gespeel. Hulle het 9 eendagwedstryde teen sewe privaatskole en klubs gespeel waarvan hulle drie gewen, vier was onbeslis en een uitgereën het. In 1986 wen dié span vir die eerste keer teen Grey High op hulle veld. Ons matriekmeisies het ook rugby teen die onderwyseresse gespeel én gewen, 9-4. Ons was glo te fiks.

As die netbalseisoen aanbreek, kon ek en Oumies nie mekaar gou genoeg op my fiets na haar huis toe 'lift' nie. Daar het ons vinnig netbalklere aangetrek, nog middagete ingestop en terug skool toe gejaag - net betyds om ons spanmaats vir die laaste keer om die baan te sien hardloop vir opwarming. Daardie laaste kilometer maak ons beurte om so hard as wat ons kan te trap sodat ons met sweetgesigte opdaag en die netbalonderwyser oortuig: "Ons is mos klaar opgewarm". Speel wou ons speel en as daardie bal nie deur die ring val nie, kry ek kyke hoor. Daar was hard gepraat op die baan. Nodeloos om te sê ek moes maar pouses doelskiet oefen.

Daar was goue jare met juffrou Juanita Lampbrecht wat met die Framesby-koor vir die pous gaan sing het en musiekfeeste bygewoon het. Ek was in die drama-klub en ons het met die dramastuk "Bird Cage" in al wat 'n kompetisie is onder leiding van Mnr. Stassen deelgeneem. Ons was 'n klomp voëls in 'n hok, elkeen in sy eie wêreld vasgevang en dan was daar die "wilde een" wat net wil wegbreek om vryheid te vind - dit is toe nou ek.

Ai, die Voortrekkers was heerlik. Die seunsspan was die "Uile" en ons die "Mossies". Daar het ons knoopwerk gedoen, vlagparades geoefen, noodhulp geleer, morsekodes uitgewerk en naweke in die somermaande gaan kamp. Ons "army" tente opgeslaan en tentinspeksies in uniform trotseer. Saans het ons met 'n kompas tydens nagmarse "verdwaal" en oor toubrûe geloop. Ons het die kampvure hoog laat brand, liedjies gesing en kampkonserte gehou. Op ander geleenthede het ons met rugsakke naweke in die berge gaan stap en in slaapsakke in grotte geslaap en bedags in waterpoele geswem.

Nog lekkerder was die "garage parties" en ons girls is "Village Gate" en "Garlicks" toe vir "outfits". Daar was nou 'n paar stywe-klere-nommers. Daar is op "Rock me Amadeus", "Don't leave me this way", "Sledgehammer", "Pappa don't preach", "Venus", "Big in Japan", "Walk like an Egyptian" en die "Final Countdown" gedans. OK Bazaars was ook in die middestad en dan koop ons gemengde lekkers wat geweeg moet word. Ek dink onmiddellik aan die "Peppermint Cups" met die tandepasta-vulseltjie in die middel...

Ek is getroud en ons is met twee pragtige seuns, Jaco (Marthinus) (26) en Thomas (23) geseën. Ek is baie lief om oorsee te reis en het al verskeie kere Duitsland, Italië, Nederland, Mauritius, Seychelles, Israel, Jordanieë, Turkye en Frankryk besoek. Ek het 'n pragtige boerboel, Boetaboel, by die huis. By my kantore in Kaapweg, het ek 'n span "sekuriteit hoenders" wat die gebou oppas. Alle duiwe en kraaie wat waag om in



die tuin besoek afte lê word deur die hoenders verjaag. “Ouma” lê net ‘n eier in die ontvangsdame se snippermandjie en versuim om in die hok te lê. Tans is dit broei-seisoen hier by die kantoor. Tussen gister en vandag, het vier nuwe kuikens uitgebroei en daar is nog op pad. Groot opgewondenheid!

Ek het ‘n Nasionale Diploma in Personeelbestuur by die destydse Port Elizabeth Technikon verwerf en is vereer met ‘n Robert Niven-beurs vir akademiese prestasie. Ek is ongelooflik geseën met ‘n suksesvolle loopbaan in skuldinvordering vir meer as 28 jaar en bestuur tans my eie maatskappy, Collect A Debt – Debt Recovery & Tracing Solutions in Kaapweg, Port Elizabeth.

Van my loopbaanhoogtepunte sluit in: die aanstelling as raadslid op die eerste Skuldinvorderingsraad van Suid-Afrika in 2003 deur die destydse Minister van Justisie, Dr Penuell Maduna (LP). Ek het op verskeie komitees binne die raad gedien. Ek is ook deur die Europese Skuldinvordings Wêreld Organisasie uitgenooi om as gasspreker tydens hulle wêreldkongres in Rome, Italië op te tree. In 2017 het ek die Regional Business Achievers-toekenning ontvang van Businesswomen’s Association of SA/Investec as die entrepreneur van die jaar.

Gebruik elke geleentheid om jou beste te gee en te wees. Vir al die toekomstige entrepreneurs is my raad: “ Moenie na julle kompetisie kyk en sê dat jy dit beter gaan doen nie. Kyk na jou kompetisie en sê jy gaan dit anders doen. Sit skouer aan die wiel en werk. ‘I never dreamt of success – I worked for it’.

Aan elke skolier in Framesby sluit ek af met dié woorde: “LEEF! Die lewe WIL geleef wees – LEEF HOM!”



**Riana Ferreira**  
**Entrepreneur Category**  
**Winner 2017**  
**Regional Achievers Award**



**Riana Ferreira**  
DIRECTOR



☎ 041 373 3000 ☎ 073 166 9213 ☎ 041 373 2593 | 086 614 7691

✉ riana@collectadebt.co.za 🌐 www.collectadebt.co.za


📍 169 Cape Road Mill Park, Port Elizabeth, 6001

**collect A debt**

Debt Recovery & Tracing Solutions (Pty) Ltd



Regional Business Achievers Award 2017 – Entrepreneur



**Looking for Payment?**



Centre Management:  
041 360 9442



Kragga Kamma Road,  
Sunridge Park



**GENERATED POWER 24/7**